

Cussegl grond vul mantegnair la taglia da cultus

Il cussegl grond recumanda da refusar l'iniziativa dals Giuvens liberals

DA MARTIN CABALZAR

Cun 110 cunter 5 vuschs recumonda il cussegl grond da refusar l'iniziativa dals Giuvens liberals «Pli pauc taglias per il mastern». Il parlament ha suandà l'argumentaziun da la regenza e da la cumissiun predeliberanta. Schizunt la fracziun liberala ha renvià il sustegn a l'iniziativa lantschada da sia partida figlia, ils Giuvens liberals. Il titel da l'iniziativa «Pli pauc taglia per il mastern» mainia totalmain en errur è vegnì crititgà da dretg fin sanester. La distgargia da taglia fissia per la gronda part da las personas giuridicas fitg marginala, per las Baselgias chantunalas sajan las sperditas dentant desastrusas, han argumentà ils responsabels. Tenor cussegliera guvernativa *Barbara Janom Steiner* pajan numnadamain 86 pertschient da las personas giuridicas en il Grischun mains che 400 francs taglia da cultus. Per las Baselgias chantunalas muntian las entradas da taglias annunalmain a radund 8 milliuns è sajan uschea ina part existenziala da lur entradas. Vegness l'iniziativa acceptada quinta la Baselgia reformada da perder radund ina terza da las entradas, per la Baselgia catolica muntassia la sperdita schizunt a varga 90 pertschient, scriva la regenza en ses messadi.

En favur da la generalitad

Tar in gea per l'iniziativa a l'urna na fissan ina part essenziala da las purschidas specialas da las Baselgias betg pli finanziablas, han argumentà regenza e parlament. I sa tractia en quest connex cunzunt da prestaziuns socialas, caritativas e culturalas che servian a la generalitad e che mundial betg angal a favur dals carterents praticonts.

En Svizra è la taglia da cultus per personas giuridicas dal reminent fitg dera-



Senza la taglia da cultus na pudessen las Baselgias chantunalas era betg adempir lur vast engaschament caritativ, social e cultural.

FOTO P. DE JONG

sada, ella vegn incassada en 18 chantuns, en dus chantuns è ella volontaria e sulettamain 6 chantuns enconuschan nagina taglia da cultus per personas giuridicas. Il cussegl grond da Turitg vegn probabel a sa fatschentar anc il november cun la medema tematica. Sco en il Grischun han era ils Giuvens liberals da Turitg inoltrà in' iniziativa corrispudenta. En tant ch'ina maiortad da la cumissiun predeliberanta refusa l'iniziativa, vul ina minoritad elavurar ina cunterproposta en vista a la votaziun dal pievel.

Grond consens en la debatta

En la debatta parlamentara ha il vicepre-

sident da la cumissiun predeliberanta *Peter Engler* (pld Tavau) accentuà chi na mondia betg per «pli pac taglia per il mastern», mabain per la «relaziun tranter stadi e baselgia». Tenor Engler èsi impressiuant tge che las Baselgias chantunalas prestan en favur da la generalitad ed en servetsch da la publicitatad.

Tenor *Jon Pult* (ps Cuir) profiteschian la finala ils fundamentalists da tuttas duas Baselgias da la liberaziun da la taglia da cultus per personas giuridicas. *Andreas Thöny* (ps Tschintg Vitgs) avertescha da stgaffir ina «societad parallela» e renda attent als servetschs multifars da las Baselgias en favur dal stadi social. Tenor ses

avis èsi era giustifitgà che las interpresas daventian cunscientas da lur respunsabilitad sociala. Era *Anna-Margret Holzinger* (pld Aschera) avertescha «da betg serrar giu la spina» finanziaria» damai che las consequenzas sajan grondas e diras.

Il schef da la fracziun liberaldemocratica *Rudolf Kunz* (pld Cuir) manaja ch' ils experts dal dretg na sajan betg units en lur pareri schebain firmas resp. personas giuridicas duain stuir pajar taglia. La fracziun liberaldemocratica saja «per gronda part» cunter l'iniziativa. A lunga vista stoppia la finanziaziun da las Baselgias chantunalas dentant tuttina vegnir tematisada, era en vista al carschament

da la populaziun betg cristiana. La pld veglia far ina intervenziun per reponderar las structuradas existentas.

Il president da la cumissiun administrativa dal Corpus Catholicum *Placi Berther* (pcd Cadi) accentuescha cun cefras concretas l'impurtanza da la taglia da cultus. La Baselgia catolica dal Grischun haja incassà l'onn passà radund 4.3 milliuns taglias da cultus, quai sajan 90 pertschient da las expensas. Dals servetschs e da las purschidas da la Baselgia catolica profiteschian tuttas personas, cunzunt era talas che drovan agid e plais pitschnas che na fussian betg ablas da mantegnair persulas lur edifizis sacralas.

Sco sulet votant è deputà *Mirco Rosa* (pld Mesauc) s'exprimì a favur da l'iniziativa. El na chapeschia betg ch' il Tribunal federal tolereschia vinavant che las Baselgias possian incassar taglias da personas giuridicas. Quai saja ina intervenziun massiva en la libertad da religiun ed impedeschia uschea ina clera separaziun da stadi e Baselgia.

Nagina surpraisa per ils iniziants

Per ils Giuvens liberals n'è la decisiun dal cussegl grond da recumandar al pievel da refusar l'iniziativa nagina surpraisa. Els hajan perquai sapientivamain lantschà in' iniziativa populara per ch' il pievel haja la chaschun da s'exprimer en chausa. Ed i na saja betg l'emprima giada che quel decidia auter che il parlament chantunal, remartga *Thomas Bigliel*. Il pievel duai avair in pled en il chapitel cu i va per la finanziaziun da las Baselgias. Ils Giuvens liberals n'intendian betg da flai-ventar las Baselgias chantunalas, anzi fermas Baselgias saja impurtant, scrivon els en in communitgà da pressa. Quai saja dentant a lunga vista mo pussaivel cun in model da finanziaziun voluntari, èn ils Giuvens liberals persvadids.